

दिनांक : 27.01.2026

समय : 18.45 बजे

- संसद अर राजस्थान विधानसभा रा बजट सत्र काल सरु व्हेला-सरकार सगळी पार्टियां ऊं सत्र ठीक ढंग ऊं चलावण मांय मदद करण री अरज कीनी।
- प्रधानमंत्री नरेन्द्र मोदी देश ने ऊर्जा हलका मांय मौकां रो भण्डार बतायो-कह्यो-भारत पेट्रोलियम उत्पाद दिसावर मांय बेचण वाळा पांच अगाडी देशां मांय शामिल।
- केन्द्रीय शिक्षा मंत्री धर्मेन्द्र प्रधान कह्यो-यूजीसी रा नुवा नियमां रो मकसद देश री आला दर्जा री भणार्-लिखाई री व्यवस्था ने साफ बणावणो।
- प्रदेश मांय केई ठोडां काल रात सरु व्ह्या अंधड़ अर बारिश रा दौर ऊं सर्दी रो असर बध्यो।

संसद रो बजट सत्र काल सरु व्हेला। 2 अप्रैल ताई चालण वाळा बजट सत्र ऊं पैली सरकार आज नई दिल्ली मांय सगळी सियासी पार्टियां रा नेतावां री मीटिंग बुलायी। रक्षा मंत्री राजनाथ सिंह री सदरत मांय व्ही ई मीटिंग मांय राज्यसभा मांय सदन रा नेता जेपी नड्डा, संसदीय कार्य मंत्री किरन रिजिजू, संसदीय कार्य राज्य मंत्री अर्जुन राम मेघवाल अर डॉ. एल मुरुगन, कांग्रेस रा नेता जयराम रमेश, द्रविड़ मुन्नेत्र कज़गम रा तिरुचि शिव, तृणमूल कांग्रेस री सागरिका घोष अर समाजवादी पार्टी रा रामगोपाल यादव समेत न्यारी-न्यारी पार्टियां रा नेता मौजूद रह्या। मीटिंग पाछे खबरनवीसां सागे बातचीत करता थकां संसदीय कार्य मंत्री किरन रिजिजू कह्यो के बजट सत्र रा पहला हिस्सा मांय राष्ट्रपति रा अभिभाषण माथे धन्यवाद प्रस्ताव रा बारा मांय चर्चा करी जावेला, ज्यीं पाछे दोन्यू सदनां मांय बजट प्रस्तावां माथे चर्चा व्हेला। श्री रिजिजू सगळी पार्टियां ऊं सत्र ने बेहतर तरीका ऊं चलावण मांय मदद करण री अरज कीनी।

000

विधानसभा रो बजट सत्र ई काल सरु व्हेला। सत्र री सरुआत राज्यपाल रा अभिभाषण सागे व्हेला। इण री पैली वाळी सांझ आज जयपुर मांय न्यारी-न्यारी सियासी पार्टियां रा नेतावां री मीटिंग राख्ही ज्यी। विधानसभा अध्यक्ष वासुदेव देवनानी री सदरत मांय व्ही मीटिंग मांय सदन री कार्रवाई बेहतर तरीका ऊं चलावण रा बारा मांय चर्चा करीजी। मीटिंग पाछे खबरनवीसां सागे बातचीत करता थकां संसदीय कार्य मंत्री जोगाराम पटेल बतायो के मीटिंग रे दौरान सदन रा बजट सत्र मांय विधायी कामां अर खास मुद्दां माथे विचार बाबत सगळी पार्टियां ऊं मदद री अरज करीजी। वे कह्यो के सरकार हर मुद्दा माथे चर्चा सारु तैयार है।

0000

प्रधानमंत्री नरेन्द्र मोदी कह्यो है के ऊर्जा हलका मांय भारत मांय मोकळा मौका है अर ओ दुनिया मांय पेट्रोलियम उत्पाद दिसावर मांय बेचण वाळा अगाडी पांच देशां मांय शामिल है। प्रधानमंत्री गोवा मांय भारत ऊर्जा सप्ताह रा चौथा संस्करण रा उद्घाटन जळसा मांय वर्चुअल तरीका ऊं बोल रह्या हा। वे भारत ने दुनिया री सब ऊं तेज बधती माली व्यवस्था बताता थकां कह्यो के भारत अब ऊर्जा सुरक्षा ऊं आगे ऊर्जा हलका मांय खुद रे पाण ऊबो व्हेवण माथे काम कर रह्यो है। श्री मोदी मेक इन इंडिया, इनोवेट इन इंडिया, स्केल विद इंडिया, इन्वेस्ट इन इंडिया रो मंत्र दीनो। वे कह्यो के भारत स्थानीय ज़रूरत पूरी करण वाळो एनर्जी सेक्टर इको सिस्टम विकसित कर रह्यो है।

000

केंद्रीय कृषि, किसान कल्याण अर ग्रामीण विकास मंत्री शिवराज सिंह चौहान रो काल बीकानेर रा दौरा सारु आवण रो कार्यक्रम है। वे पॉलिटेक्निक कॉलेज मांय राख्हा जावण वाळा कार्यक्रम मांय शामिल व्हेला। ई पाछे केन्द्रीय कृषि मंत्री रो देशनोक रा करणी माता मंदिर मांय दर्शन कर र पूजा-अर्चना रो कार्यक्रम है। सिंज्या श्री चौहान राष्ट्रीय उष्ट्र अनुसंधान केंद्र मांय अहलकारां सागे मीटिंग करेला।

000

केन्द्रीय शिक्षा मंत्री धर्मेन्द्र प्रधान कह्यो है के सरकार यूजीसी रा नुवा नियमां ऊं जुड़्या सगळा पक्षां री बात सुण रही है। वे आज छोटी खाटू मांय राख्ही ज्या एक कार्यक्रम मांय शामिल व्हेवण सारु पधार्या हा। खबरनवीसां सागे बातचीत करता थकां वे कह्यो के सरकार भणार्-लिखाई रा हलका मांय सुधारां सारु मिल्या सगळा सुझावां माथे गंभीरता ऊं विचार कर रही है।

0000

मुख्य सचिव वी. श्रीनिवास प्रधानमंत्री स्वनिधि योजना रो फायदो हर जरूरतमंद रेहड़ी पटरी वाळां ताई पूगावणो तय करण रा हुकम दीना है। वे आज जयपुर मांय राज्य स्तरीय बैंकर्स समिति री मीटिंग मांय बोल रहया हा। मुख्य सचिव प्रधानमंत्री स्वनिधि योजना री जाणकारी अर फायदो शहरां सागे कस्बां अर गांवां मांय ई पूगावण माथे जोर दीनो।

000

राज्य सरकार अहलकारां अर कर्मचारियां रा तबादला माथे रोक 14 फरवरी ताई बधा दीनी है। प्रशासनिक सुधार विभाग कानी ऊं ई बाबत हुकम जारी करी ज्यो है। महकमा रे मुजब वोटर लिस्टां रा पुनरीक्षण रा काम ने ध्यान राखता थकां ओ फैसेलो करी ज्यो। हुकम रे मुजब घणो जरूरी व्हेवण री सूरत मांय तबादला सारू निर्वाचन आयोग री मंजूरी लेवणी व्हेला। ध्यानजोग है के राज्य मांय वोटर लिस्टां 14 फरवरी ने अंतिम तौर ऊं छापी जावेला, ज्यी पाछे तबादला माथे रोक हटा ली जावेला।

0000

वरिष्ठ नागरिक तीर्थ यात्रा योजना रा तैत आज हनुमानगढ़ जंक्शन ऊं द्वारका-नागेश्वर-सोमनाथ सारू खास तीर्थ यात्रा रेलगाड़ी रवाना व्ही। श्रीयादे माटी कला बोर्ड रा अध्यक्ष प्रहलाद राय टांक इण ने झंडी बता र रवाना कीनी। देवस्थान मंत्री जोराराम कुमावत बतायो के ई ए.सी. गाड़ी मांय हनुमानगढ़, श्रीगंगानगर, बीकानेर अर जोधपुर रा 970 बुजुर्ग सफर करेला। आ गाड़ी 1 फरवरी ने पाछी आवेला।

0000

प्रदेश मांय केई ठोडां काल सरू व्ह्या अंधड अर बारिश रा दौर ऊं ठारी रो असर बध ग्यो है। केई जिलां मांय मेह सागे ओला पड़बा अर सीळो बायरो बाजण रा ई समाचार मिल्या है। राजधानी जयपुर मांय संवारे री पोर बिरखा व्ही अर आखा दिन बादळा मंड्या रहया। डींग मांय कठे-कठे छांटो छिड़को व्ह्यो अर कुछ जगहां तेज पाणी बरसबा ऊं पारो घणो उतर्यो। भीलवाड़ा रा केई हलकां मांय छांटा-छिड़का सागे सीळो बायरो बाजण ऊं ठिटुरन बध ग्यी। म्हाणा भरतपुर खबरनवीस बतायो के वठे बिरखा व्हेवण ऊं जिंदगी माथे असर पड़्यो।

-----

भीलवाड़ा जिला रा जहाजपुर मांय तेज बिरखा सागे ओळा पड़्या। धौलपुर मांय आखा दिन मेह बरस्यो। सवाईमाधोपुर समेत केई जिला मांय हल्की ऊं मझला दर्जा री बिरखा व्हेवण रा समाचार है। घणखर जिला मांय दिन री बगत ई तापमान 20 ऊं 23 डिग्री सेल्सियस बीचे दर्ज कर्यो जा रह्यो है। मौसम केंद्र जयपुर आज भरतपुर, बारां, कोटा, करौली अर सवाई माधोपुर जिलां मांय ओळा अर बीजळी पड़बा सारू चेतायो है। मौसम केंद्र जयपुर रा निदेशक राधेश्याम शर्मा बतायो के आवता दो दिन बिरखा-छांटो चालतो रेहवण रा आसार है।

00000

सरकार देश मांय पाणी बचावण रा कामां सारू 32 हजार करोड़ रुपया राख्या है। जल शक्ति मंत्री सी. आर. पाटिल आज नई दिल्ली मांय जल अर स्वच्छता योद्धावां सागे बातचीत रे दौरान आ जाणकारी दीनी। वे कह्यो के मनरेगा निधि रो 65 फीसदी हिस्सो पाणी बचावण ऊं जुड़्या कामां माथे खर्च कर्यो जावेला। जलशक्ति मंत्री बतायो के प्रदूषण माथे काबू करण सारू ई साल नमामि गंगे मिशन रा तैत 15 परियोजनावां पूरी करी ज्यी है।

0000

राष्ट्रपिता महात्मा गांधी री बरसी 30 जनवरी ने शहीद दिवस रा तौर ऊं मनायी जावेला। देश ने आजादी दिरावण री लड़ाई मांय प्राण निछावर कर देवण वाळा रा मान मांय ई मौके आखा राज्यां मांय संवारे 11 बज्यां दो मिनट रो मौन राख्यो जावेला। जयपुर मांय मौन री सरुआत अर खत्म व्हेवण री जाणकारी देवण सारू 13 ठोडां सायरन बजाया जावेला। जिला कलेक्टर डॉ. जितेन्द्र कुमार सोनी बतायो के इण री तैयारी रा तैत काल अर 29 जनवरी ने संवारे 10 बज र 59 मिनट परां सायरन बजाया जावेला।

0000